

NEEEMI

Sa ko kpī su Neeemin tirerun gari bənu ko ita.

Gbiikaa, Yerusalemun gbārarun bana. Babilonin sina bokowa u Neeemi gora u ka səmbu te kpara. U maa gāa dabinu sənwa sāarun swaa səə ka maa ben tiin wāasinaan swaa səə.

Yiruse, Esidarasi u təmbu Yinni Gusunən wooda garia, ma tən be kpuro ba ben toranu wa, ma ba nin suuru bikia ba ka Gusunə arukawani kpaa bəkua.

Itase, ya sun səəmə ma Neeemi u sāa kparo Yudabə səə. Ye ya sāa gāa girinu win wāaru səə, yera u tii Gusunə wē mam mam. Wiya u ra Gusunə kanə saa kpuro.

Tire ten kpunaa

1. Ba Yerusalemun gbāraru bana, wiru 1n di sere wiru 7.
2. Ba Yinni Gusunən woodaba gara ma ba ka nùn arukawani kpaa bəkua, wiru 8n di sere wiru 10.
3. Ye Neeemi u kuan sukum, wiru 11n di sere wiru 13.

Neeemi u Yerusalemun labaari nua

¹ Gari yi Neeemi Hakalian bii u yoruə, yi wee. U nəe, Aatasesin bandun wōə yenduse səə, gen suru nəəba nnese səəra ne Neeemi na wāa wuu bəkə ge ba mə Susiə. ² Yera nən mero bisi turo wi ba mə Hanani u tunuma saa Yudan tem di ka təmbu gabu ma na bu Yuu be ba n̄ yoru mwəera ka Yerusalemun labaari bikia. ³ Ma ba man wisa ba nəe, be ba n̄ yoru mwəera mi, ba wāa Yudəə yāa bakaru ka seku

bakaru səə. Ma Yerusaləmun gbāranu nu kurunu mə ma nin gamboba ba dəə mwaakira.

Neeemi

u kanaru mə Yuuban səə

⁴ Sanam mə nə Neeemi na labaari ye nua, na sinawa ka swīi. Na wāa nuku sankiraru səə səə dabinu. Ma na nəə bəkua na Wərukoo kanam wəri. Na nün səəwa na nəe, ⁵ Yinni, wunə wi a wāa wəllə, a kpā. A dam kpuro mə. A ra wunen arukawani yibie be ba nun məm nəəwammen mi, kpa a be ba nun kī wənwəndu kua. ⁶ A man məerima. A swaa dakio ye na nun kanamo nə wunen səm kowo. Səə səə ka wəkuru na nun kanamo besə Isirelibən səə, besə wunen səm kowobu. Na nun kanamo a sun besen durum wəko. Geema, nə ka nən yənugibu sa torawa, ⁷ ye sa n̄ ka wunen woodaba ka wunen gere ka wunen yiirebu məm nəəwə ye a Məwisi wunen səm kowo wə. ⁸ A yaayo ye a Məwisi səəwa u sun səə. A nəe, sà kun nun məm nəəwə, kaa sun yarinasia sa n wāa bwesenu kpuron suunu səə. ⁹ Adama amen biru, sà n gəru gəsia sa wurama wunen mi, ma sa wunen woodaba məm nəəwə, kaa sun kasum da baa sà n toman na, kpa a ka sun wurama tem mə a gəsa səə mi a nəe, kaa n wāa. ¹⁰ Yinni Gusunə, sa sāawa wunen təmbu ka maa wunen səm kowobu. Besera a yakia ka wunen dam bakam. ¹¹ Yinni Gusunə, a suuru koowo. A nən kanaru nəəwə ka maa be ba nun naane sāa ba kī bu nun bəere wə. A de nən sanum mu dora sina bokon mi, kpa u ka man nənu geu məeri.

N deema saa ye səə, na sāawa sina bokon səm kowo wi u ra nün tam dokeye nəraə.

Aatasəsi u wura

Neeemi u g̃osira Yerusalemuo

2

¹ Ye Aatasesi u kua wōo yendu bandu sōo, wōon suru gbiikoon t̃tru garu, u sō u dimo, ma na tam sua na nūn wē. Adama saa ye sōo, na nuki sankire too. Na ñ nuki sankirare nge mē. ² Yera sina boko u man bikia u nee, amona nēn wuswaa ya ka burisine mē. Na barōwa? Nuku sankira nirà na mō mē.

Yera na nanda too. ³ Adama ka mē, na kpīa na nūn sōowa na nee, yinni, wunen wāaru tu dákaa da. Na ñ kpē na kun nuki sankire. Domi wuu gèn mi ba nēn sikadoba sika ga kua bansu. Ma gen gbārārun gamboba ba dōo mwaakira.

⁴ Sina boko u man bikia u nee, mba na kī u man kua.

Yera na yande Wōrukoo kana. ⁵ Ma na nūn wisā na nee, yinni, à n ka man nōnu geu meera, a de n wura Yudaban temo wuu gèn mi ba nēn sikadoba sika kpa n gu bani n seeya.

⁶ N deema sina boko ka win kurōwa ba sō dōma te. Yera u maa man bikia u nee, sōo nyewa kon ko mi. Saa yerà kon wurama.

Ma na nūn sōowa saa ye kon wurama. Ma u wura n da. ⁷ Yen biru, na nee, sina boko, na nun kanamo, a man tireru wēeyo tem yēro be ba wāa Efaratin sōo duu yeru gian sō bu ka man deri n turi Yuda. ⁸ Mēya na maa kī a man tireru garu wē Asafun sō wi u sāa sina bokon dāa kōso kpa u man dāa kē n ka dii te ta wāa sāa yerun bōkuon gamboba ko ka wuu gen gbārārun gamboba ka sere diru mi nēn tii ko na n wāa.

Yera sina boko u man tire ni kpuro wē. Domi Gusunə u wāa ka ne. ⁹ Ma u tabu sinambu ka

maasəbu gəsa bu ka man yōsiri. Yera na seewa na da na tem yēro be deema be ba wāa sōo duu yeru già mi. Ma na bu sina bokon tire ni wē. ¹⁰ Sanam mē Sambala wi u sāa Horoni ka win sōm kowo Tobiya wi u sāa Aməni ba nua ma na wee n ka Isireliba gea kua, yera ben nuki sankira too.

*Neeemi u mēerimə
mi gbārara sankira*

¹¹ Sanam mē ne Neeemi na tunuma Yerusalem, na sinawa gina sōo ita. ¹² Na n̄ goo sōo wa ye Gusunə nen Yinni u man sōo wa n̄ ko Yerusalem sō. Yen biru, na seewa wōkuru ka tōmbu gabu. Na n̄ yaa saberu garu sue ma n̄ kun mō keteku ge na sōni. ¹³ Wōku suunu sōo, na yara saa kōnnō ge ga wāa wōwa gian di na da bwiāo ye ba mō Yaa gōba ka maa sere kōnnōwō mi ba ra kubanu yari. Ma na Yerusalem gbāra te mēera mēera, na wa ta kurunu mō. Ma ten gamboba ba dōo mwaakira. ¹⁴ Ma na da kōnnō ge ga wāa bwia ye ba gban bōkū ka sere sina bokon bwiāo. Adama ayeru garu sari mi nēn keteku ga koo ka sara. ¹⁵ Ma na kpa ka Sedoronin wōwa già na ka gbāra te mēeri mēerimō sere na ka tunuma kōnnō ge ga wāa wōwa giào mìn di na raa ka yara.

¹⁶ Saa ye sōo, wuun siri kowobu ba n̄ yē mi na da ka ye na mō. Domi na n̄ Yuu goo gāanu sōo wa baa ka yāku kowobu ka wuun bukurobu ka sere tem men kparobu. ¹⁷ Adama ye na wurama na bu sōo wa na nēe, been tii i wa nge mē Yerusalem ya sāa. Wee ya bansu kua. Ma yen gbārarun gamboba ba dōo mwaakira. Yen sō, su yen gbāra te seeya kpa sa kun maa wāa sekuru sōo.

18 Ma na bu s̄ōwa nge mē Gusuno nēn Yinni u man kōsu ka ye sina boko Aatasesi u man kua. Yera be kpuro ba yande nōagiru sua ba nēe, su se su gbāra te bani.

Ma ba dam kēna ka gari yi. **19** Adama Sambala wi u sāa Horoni ka win sōm kowo Tobiya wi u sāa Aməni ka Gesemu wi u sāa Daarubu ba yen labaari nua. Yera ba sun yaakoru torua. Ma ba sun bikia ka gendu mba sa mō mi. Sa kasuwa su sina boko seesi?

20 Ma na bu wisa na nēe, Yinni wi u wāa wällə wiya u koo sun nasara wē. Besē win sōm kowobu sa ko sewa su wuu ge bani. Adama bēe, i n̄ baa mō ge sōo, i n̄ maa gāanu mō i gere mi. I n̄ ko mam bweseru garu deri tēn sō ba koo bēe yaaya.

*Yuuba ba Yerusalemun
gbārarun bana seewa*

3

1 Yera yāku kowo tōnwero Eliasibu u seewa ka yāku kowo be ba tie, ba kōnnō ge ba mō Yāanun gani seeyā. Ma ba yi sārasia ba yi nēnem ka yāku yāki. Yen biruwa ba yen gamboba doke. Saa min di, ba maa gbāraru sōnwa Mēan kōsu yerun di sere n ka girari kōsu yee te ba mō Hananēeli. Ma ba maa ten tii sārasia. **2** Yera Yerikogibu ka Sakuri Imirin bii ba sōmburu kua Eliasibun bōku. **3** Senaagibu ba bu somi ba ka kōnnō ge ba mō Swēe bana. Ba gen kadiriba kua ka gen kōkōrōba. Ma ba ye kpuro doke gambo ye sōo. **4** Ben bōku Mēremētu, Urin bii, Hakōtun debubu, u maa somi sōmbu te sōo. Ben bōku maa Mesulāmu, Berekian bii, Mēsesabēlin debubu u maa somi sōmbu te sōo. Ben bōku,

Sadəku, Baanan bii u maa somi səmbu te səə. ⁵ Ben bəkuə, Tekoagibu ba maa na bu ka somi səmbu te səə. Adama ben wirugliba yina bu səmbu ten kparobu wiru kpīiya.

⁶ Yoyada Paseakin bii ka Məsulamu Besodian bii ba kənnə ge ba mə Yesana sənwa ba bana. Ba gen kadiriba kua ka gen kəkərəba ka sere maa gen səretii. ⁷ Be ba maa səmburu kua ben bəkuə be wee, Məlatia Gabaonigii ka Yadoni Məronətugii ka Gabaonigibu ka Misipagibu. Beya ba bana n ka girari tem yēron dirə wi Babilonin sina boko u yi mi. ⁸ Ben bəkuə be ba maa somi wee, Usiel, Harayan bii wi u sāa wuran səm kowobun turo ka Hanania wi u sāa turare kowobun turo. Ba ben səmburu kua ba ka da sere mi Yerusaləmun gbāraru ta yasum sosi. ⁹ Ben bəkuə Refaya, Hurin bii wi u sāa Yerusaləmun bee tian kparo u maa somi səmbu te səə. ¹⁰ Benin bəkuə maa, Yedaya, Harumafun bii u gbāraru sənwa u bana te ta wāa win yənun dee deeru. Yen biru Hatusi, Hasanian bii u bana u sweesi. ¹¹ Maakiya, Harimun bii ka Hasubu, Pasati Məabun bii ba maa gbāra ten gam sənwa ka kōsu yee te ba mə Pēen dōo səru yeru. ¹² Benin bəkuə Salumu, Halosəsin bii wi u Yerusaləmun wəə beri tia kpare u maa somi ka win bii wəndiaba. ¹³ Hanuni ka Sanəagibu ba kənnə ge ga wāa wəwa già sənwa ba gu bana ba gen kadiriba ka gen kəkərəba ka gen səretii doke. Mi ba bana mi, n kuawa gəm soonu nərəbu (1.000) ba ka girari kənnə gən min di ba ra kubanu yari. ¹⁴ Maakiya Rekabun bii wi u sāa Beti Hakerəmun beran tem yēro u kənnə gən min di ba ra kubanu yari sənwa. Ma u gen kadiriba kua u doke ka gen kəkərəba ka

sere maa gen s̄eretii.

¹⁵ Saluni, Kolohose Hoseen bii, Misipan tem yero u kɔnnɔ ḡèn mi già bwia wāa s̄onwa u gen kadiriba kua ka gen k̄ek̄or̄ba ka gen s̄eretii. Yen biru u Siloen ȳerun gana bana u ka na sere sina bokon saadiēn ganan b̄okuɔ ka ȳoɔtia ye ba kua ba ra ka de sina boko Dafidin wuu già. ¹⁶ Win b̄okuɔ Neeemi Asibukun bii, wi u Beti Surin bee tia kpare u gbāraru s̄onwa u ka da sere Dafidi ka wigibun s̄iku yero ka mi ba bwii gba ka sere mi tabu durəbun dira wāa. ¹⁷ Win b̄okuɔ Lefiban bweseru ta maa bana saa min di. Wi u sāa ben wirugii wiya Rehumu, Banin bii. Yen biru Hasabia wi u sāa Keilan bee tian kparo u maa s̄onwa ye ya wāa win bera già. ¹⁸ Ben b̄okuɔ win mero bisibu ba maa sua min di. Wi u bu kpare wiya Bafai, Henadadin bii. Wiya u maa Keilan bera ye ya tie kpare. ¹⁹ Ben b̄okuɔ Esee, Yosuen bii, Misipan sunɔ u maa sua min di u ka da sere mi ba ra tabu yānu bere gbāraran goo ḡomkirɔ. ²⁰ Win b̄okuɔ Baruku, Sabain bii u maa sua min di u bana saa goo ḡomkii ten min di n ka girari yāku kowo t̄onwero Eliasibun dii kɔnnɔwɔ. U s̄ombu te kua ka kīru. ²¹ Saa min di, Meremətu, Urin bii, Hak̄tun debubuwa u maa bana saa Eliasibun dirun kɔnnɔn di sere ka dii ten bera giɔ.

²² Win b̄okuɔ yāku kowo be ba wāa Yerusaləmun baru kpaanɔ ba maa begia bana. ²³ Ben b̄okuɔ Benyamee ka Hasubu ba maa s̄onwa ba bana ben dian dee deeru. Ma Asaria Maaseyan bii, Ananian debubu u maa bana win dirun b̄okuɔ. ²⁴ Ben b̄okuɔ Binui, Henadadin bii u maa bana saa Asarian dirun di sere ka gbāra ten goo ḡomkirɔ. ²⁵ Pala, Usain biiwa u maa s̄onwa goo ḡomkii ten dee deerun di

n ka da wuu kōsobun dirō te ta sina kpaaru mēera
pirisōm dirun bōkuo. Min diya Pedaya, Pareōsin
bii u maa sōnwa. ²⁶ Netini be ba wāa gungunō ba
maa sōnwa ba bana ba ka da kōnnōwō ge ga wāa nim
gia sōo yari yero giā wuu kōsobun dirun dee deeru.
²⁷ Ben bōkuo Tekoagibu ba maa sōnwa ba bana wuu
kōsobun dii bakarun dee deerun di n ka da gana ye
ya wāa gungurō.

²⁸ Kōnnō gēn min di dumi ra ka du, yāku kowo
ben baawurewa u mi sōnwa u bana win dirun dee
deeru. ²⁹ Ben bōkuo Sadəku, Imerin bii u sōnwa u
bana win dirun dee deeru. Ma Semaya, Sekanian
bii wi u sāa kōnnō ge ga wāa sōo yari yero gian kōso
u maa sōnwa u bana. ³⁰ Win bōkuo Hanania, Se-
lemin bii ka Hanuni, Salafun bii nōoba tiase be, ba
maa seewa ba gbāra ten gam sōnwa. Ma Mesulamu,
Berekian bii u maa sōnwa win dirun dee deeru.
³¹ Win bōkuo Maakiya wuran sōm kowobun turo
u maa sōnwa u ka da Netiniba ka tenkuban yēnusō
Mifukadin kōnnōn dee deeru sere ka dii tēera ye ya
wāa gbārarun goo gōmkirō. ³² Wuran sōm kowo be,
ka tenku be, ba maa sōnwa dii tēera yen min di sere
n ka da kōnnōwō ge ba mō Yāanu.

Yibəreba

ba kī bu sōmbu te yōrasia

³³ Sanam me Sambala ka wigibu ba nua ma bēse
Yuuba sa gbāra te banimō, yera ba moru seewa
ka dam. ³⁴ Ma ba sun yaakoru mō Samarin tabu
kowobun wuswaaō ba mō, mba Yuu wōnwōndo
beni ba mō. Sa ko bu deriwa bu ben sōmbu te ko?
Sa ko bu deriwa bu Gusuno ben Yinni yākuru kua?
Sa ko wura bu sōmbu te wiru go? Sa ko wurawa

bu maa ban si seeya sìn kpenu dɔɔ mwaakira kpuro mi?

³⁵ Tobiya wi u sãa Amɔni u wāa win bɔkuɔ. Ma u neε, bana yeren bwesera ba mò me. Gana ye demaku gà n yɔɔwa ya koo wɔruma mi?

³⁶ Yera ne Neeemi na nɔɔgiru sua na neε, Gusunɔ besen Yinni, a swaa dakio a nɔ nge me besen yibereba ba sun yaakoru mò. A de ben yaako ten are yi wɔri ben wiru wɔllɔ. A de bu ben yānu gura bu bu yoru mwεeri bu ka da tem tukumɔ. ³⁷ A ku bu ben durum wɔka, domi ba sun wɔnwa gbāra te sa banimɔn sɔ.

³⁸ Nge meyá sa ka gbāra te kpuro bana sere ten gunum bɔnun saka. Be ba sɔmbu te kua, ba tu kuawá ka nuku tia.

4

¹ Sanam me Sambala ka Tobiya ka Daarububa ka Amɔniba ka Asidɔduqibu ba nua ma Yerusalemun gbāra ten sɔmbura s̄līmɔ, ba maa ten kuu dabinu kɔrumɔ, yera ba mɔru besira too. ² Ma ba nɔɔ tia kua bu ka Yerusalemu wɔri kpa bu yen tɔmbu burisina.

³ Yera sa Gusunɔ besen Yinni kana ma sa gbāra te kɔsu sɔɔ sɔɔ ka wɔkuru. Sa yibere be mara. ⁴ Adama Yudaba ba gerumɔ ba mò, gbāra ten wɔrumaan tem kusanu nu kpā sere besen sɔm kowoba wasira ka nin gurabu. Sa n̄ kpɛ su tu bani.

⁵ Ma besen yibereba ba tamaa sa n̄ ben baaṛu nɔɔmɔwa, sa n̄ maa bu wasi sere dɔma te ba koo sun wɔri bu go kpa bu besen sɔmbu te yɔrasia.

*Neeemi u tɔn be ba sɔmburu mò
tabu yānu wɛ*

6 Yuu be ba wāa bēsen yibereban suunu sāo ba na ba sun sōowa nōn dabina kari ye ya wee saa yibere ben min di ka sere mīn di ba koo sun wōrima. **7** Yen sōna na tōmbu tabu yānu wē ben baawure ka win takobi ka win yaasa ka win tendu. Ma na bu yi yi bwese kera ka bwese kera gbārarun biruɔ mi ba n̄ gina banε. **8** Ma na seewa na bukurobu ka siri kowobu ka tōn be ba tie sōowa na nēe, i ku ben berum ko. I yaayo ma Yinni Gusunɔ u kpā. Wiya ba koo nasia. I tabu koowo bēen mero bisibun sō ka bēen bibun sō ka bēen kurəbun sō ka sere bēen yenusun sō.

9 Yen biru, bēsen yibereba ba nua ma ba sun sōowa ye ba mō kpuro. Gusunɔ u maa ben himbabā kam koosia. Ma baawure u wura mi u raa sōmburu mō. **10** Saa dōma ten di, nen sōm kowobun sukum mu ra n sōmburu mōwa kpa be ba tie ba n yaasi ka terenu ka tennu beki kpa ba n yabe tarakpenu doke. Kpa bēsen wirugibu ba n sun dam kēmo. **11** Be ba maa gbāra te banimō ka be ba kpenu guramō, ba ra n nōm teuɔ tabu yānu nēniwa kpa ba n ka teu sōmburu mō. **12** Ben baawure u ra n win takobi sārusiewa pōrao. Wi u ra kōba so, wiya u ra n man swī. **13** Ma na bukurobu ka siri kowobu ka sere tōn be ba tie mi sōowa na nēe, bēsen sōmbu te, ta kpā. Wee sa yarinε baama kpuro. Goo kun ka goo turuku gbāra ten sōmburu sāo. **14** Yen sō, i n kōban swī nua, i mennama nēn mi bera gee i yen swī yi nua. Gusunɔ bēsen Yinni u koo sun sanna.

15 Nge meya sa ka sōmbu te mō. Bēsen sukum mu yaasi nēni saa bururun di sere ka wōkuru. **16** Na maa wure na bu sōowa na nēe, baawure u kpunɔ Yerusalemun nukuru ka win sōm kowobu kpa su dom se wōkuru sa n yibereba mara. Kpa su

somburu ko sõõ saõ. ¹⁷ Ma ne Neeemi ka ñen mero bisibu ka ñen sõõ kowobu ka ñen kõsobu be ba man swiõ, bëse kpuro sa ñ bësen yãnu potira. Ma baawure u win tabu yãnu ka win nim neni.

Neeemi u taki kpeesia

5

¹ Sõõ teeru, Yuuban tõn durõbu ka ben tõn kurõbu ba ka begibu gabu mõru mõ. ² Gaba gerumõ ba mõ, bëse ka bësen bibu, sa dabi. Yen sõ, sa alikaman bukata mõ ye sa ko di sa n ka wää. ³ Gaba maa gerumõ ba mõ, sa bësen gbea ka bësen resem gbaanu ka mam bësen dia tõruba yiimõ su ka alikama wa gõõrun saa. ⁴ Gaba maa gerumõ ba mõ sa gobi bõkurawa bësen gbean dñanu saõ su ka wa su Babilonin sina bokon wõõ gobi kõsia. ⁵ Adama bëse kpuro sa sääwa bwese teeru. Bësen bibu ka ben bibu tia yera. Adama ba sun tilasi mõ su ka bësen bibu yoru kpëe. Bësen bii wõndia dabiru ta mam wää yoo te saõ kõ. Sa ñ maa kpë su gãanu ko domi wee ba bësen gbea ka bësen resem gbaanu tõruba mwa.

⁶ Sanam me na ye kpuro nua, ka tõn ben weewee ni ba mõ, yera mõru man mwa gem gem. ⁷ Ma na gõru doke n bukuro be, ka siri kowo be gerusi. Ma na be kpuro sokusia ba mënna. Na bu bïkia na nee, amõna i ka bëen mero bisibu gãanu bõkuramõ i nim dokemõ. ⁸ Ma na bu sõõwa na nee, sa bëen mero bisi be ba tii tõn tukobu dõre yakia ka dam me sa mõ. Yera bëen tii i maa bu dõramõ bëen tii tiine saõ?

Ma ba mari ba ñ maa gãanu wisa. ⁹ Na maa wure na nee, ye i mõ mi, ya ñ wä. Ya weene i n Gusunõ nasie, kpa bwese tukunu nu ku sun wõmë. ¹⁰ Nen

ti i ka n̄en tundo bisibu ka n̄en s̄om kowobu sa t̄n be gobi ka alikama b̄ekura. Adama su bu ye kpuro deria. ¹¹ N̄ n̄men na, i doo saa gis̄on di i ben gbea ka ben resem gbaanu ka ben dia ye i t̄ruba mwa wesia. Kpa i maa are yin tii bu wesia yi i bu mwaari gobi yi i bu b̄ekura s̄oo ka alikama s̄oo ka tam s̄oo ka sere maa gum s̄oo.

¹² Ma ba man wis̄a ba n̄ee, sa ko ye wesia. Sa ñ̄ maa bu ḡānu mwaarim̄. Sa ko kowa nge me a gerua.

N̄ deema na yāku kowobu sokusia. Ben wuswaaora ba n̄o mw̄ee ni kua ka b̄ɔri. ¹³ Yen biru na n̄en yaberu nenua na kpara ma na n̄ee, wi u kun win n̄o mw̄eeru yibie, Gusun̄o u yēro kparo nge mesum kpa u yēro yara win yēnun di. U de yēron dukia yu doona kpa u yōra n̄em dira.

Ma be kpuro ba wura ba n̄ee, ami, n̄ yēro koowo mesum.

Ma be kpuro ba Yinni Gusun̄o siara. Yen biru ba ben n̄o mw̄ee ni yibia.

¹⁴ Saa sina boko Aatasesin bandun w̄ō yēndun diya u man kua Yudaban kparo sere n̄ ka girari win bandun w̄ō tēna ka yiru. N̄ kuawa mi w̄ō w̄okura yiru. Saa ye kpuro s̄oo, ne ka n̄en mero bisibu sa ñ̄ tem yērorun ḡānu mwaare. ¹⁵ Adama n̄ sere tunuma mi, kparo be ba raa wāa mi, ba ra t̄ombu w̄ō gobi burewa n̄ kpā kpa bu bu dīanu mwaari ka tam ka sere maa sii geesun gobi weeru. Yen biru, ben s̄om kowobu ba ra n̄ t̄ombu dam d̄arem̄owa. Adama ne, na ñ̄ kue me, yēn s̄ō na Gusun̄o nasie. ¹⁶ Besen tiiwa sa s̄omburu kua sa ka gbāra te s̄onwa. Sa ñ̄ maa gberu garu dwa besen tiin s̄ō. N̄en s̄om kowobu kpurowa ba ka man s̄ombu te kua. ¹⁷ Ka me, Yuuba ka ben wirugibu be ba ra di n̄en yēnuo,

ba sãawa wunaa weeru ka wôkuru ka sere maa sãa
be sa ra wa tem tukum di. ¹⁸ Tôo baatere naa na ra
de bu go ka yãanu nœba tia ni nu gea sãa ka sere
maa gue. Yen biru sãa wôkuru ka sãa wôkura, ba ra
ka man tam naawé. Ka me, ye kpuro sãa, na ñ tõmbu
tem yërorun gãanu bikiare. Domi ben ye ba mò ya
kpã kô.

¹⁹ Yinni Gusuno, a man yaayo ye na tõn be kuan
sã, kpã a ka man nœnu geu meeri.

Yibereba ba maa kpam seewa

6

¹ Sambala ka Tobiya ka Gesemu wi u sãa Daarubu
ka sere besen yibere be ba tie ba nua ma sa gbâra te
kpuro sœnwa, ten gambobara ba tie. ² Yera Sambala
ka Gesemu ba man goria ba nœe, n na su wesianœ ko
Kefirimuœ Onœon wœwao. N deema kôsa tõn be, ba
bwisika bu man kua. ³ Yera na maa bu goria na nœe,
na sãmburu mò ta kpã, na ñ kpë n tu deri n na. Domi
nà n tu deri ta koo yôra.

⁴ Yera ba man goria mesum sere nœn nnœ. Adama
gari tee yiya na ra bu wisi. ⁵ Yera Sambala u maa
man win sœm kowo goria nœn nœbuse. Sœm kowo
wi, u tireru nœni te ba ñ wukiri. ⁶ Wee ye ya yorua
tire te sœa. Ta nœe, Gesemu u nœe, labaari gaa ya
nœoramœ bwesenu sœa. Yera wune ka wunegibu i be
sœoru kpa i ka tii yina. Yen sœna a gbâra te seeyamo.
Wunen tii a kî a be ko ben sina boko. ⁷ A mam be
Gusunœn sœmœbu gœsa be ba koo kpara Yerusalemœ
ma a kua Yudaban sina boko. Të, a n yë ma n ñ teemœ
sina boko u ka labaari ye nœ. Yen sã, a na su wesiana
sannu. ⁸ Ma na Sambala wisa na nœe, weesa a mò.
Wuna a wunen gari sekumœ. ⁹ Besen yibere be, ba

kookari kua bu ka sun nandasia. Ba tamaa sa ko mwia kpanawa su səmbu te deri.

Tẽ, Yinni Gusuno a man dam kẽeyo səmbu te səo.

10 Yen biru, na wura na Semaya Delayan bii Məhetəbelin debubu deema. N deema u raa tii kənusi ma u nee, su da sannu Yinni Gusunən sāa yerə sere səawə su kuke. Kpa su tii gamboba kənusi. Domi yibere be, ba wee bu ne, Neeemi go wōkuru. **11** Ma na nùn wisə na nee, tənu wi sāa nge ne u koo maa duka su yibereban wuswacə? Nge wara u koo du Yinni Gusunən sāa yerə u yari wasiru. Na n̄ duə mi.

12 Domi na tuba ma n̄ Gusuno u nùn gərima. Adama u win gari geruawa yèn sō Sambala ka Tobiya ba nùn gobi kəsia u ka ye ko. **13** Tən be, ba tamaa ù n kua mε, kon berum ko kpa n win gere swī n wəri durum səo, kpa bu nən ȳisiru sanku n bəere bia.

14 Yinni Gusuno, a de a n yaaye ye Tobiya ka Sambala ka Gusunən səmə Nəadia tən kurə wi, ba kua ka sere Gusunən səmə be ba tie ba kasu bu man berum tia.

15 Sa gbāra ten bana kpawa suru wi ba mò Elulun sō yenda nəəbuse səo. Sa səmbu te kuawa sō weeraakuru ka yiru. **16** Sanam mε besen yibereba ka bwese ni nu ka sun sikerenε ba nua sa gbāra te seeya, yera ba berum soora. Ma sekura bu mwa. Saa ye səora ba tuba ma Yinni Gusunəwa u dera səmbu te, ta koora.

17 Sanam mε sa bana ye mò, Yudan wirugibu gabu ka Tobiya ba ra n tirenu kuanammewa kiri kiri.

18 Domi Yuu dabira ta nəə tia kua ka wi, ka bɔri yèn sō u Yuu wi ba mò Sekania, Aran biin bii wəndia sue kurə. Meyə maa Tobiyən bii Yokanani u Yuu wi ba

mò Berekia, Mesulamun biin bii wəndia sue kurɔ. **19** Ba ra n mam wi, Tobiyan gea gerumɔwa nən wuswaaɔ kpa bu da bu nùn nən gari swaa gurea. Tobiya wi, u ra n man tirenu kuammewa u ka man nandasia.

Nge me ba koo ka Yerusalemu kɔsu

7

1 Sanam me sa gbāra te bana sa kpa sa ten gamboba doke, yera sa be ba ra kənnəsu kɔsu doke ben səma səo ka sere maa wom kowobu ka Lefi be ba tie. **2** Ma na nən məo Hanani wooda wɛ u Yerusalemu kpara, wi ka Hanania, wi u sāa Yerusalemun gbāra kɔsobun wirugii. Durɔ wi, u tɔn be ba tie kere. Domi u sāa naanegii ma u Gusunə nasie. **3** Na bu sɔ̄wa na nee, ba ñ Yerusalemun kənnəsu keniamɔ ma n kun mə sɔ̄ u yara. Yoka ba koo su kənewa kənnə kɔsobu bu sere doona. Yen biru, ba koo Yerusalemugibu bikia bu wuu kɔsu, ben baawure u n yɔ̄ win dii kənnəwɔ.

Yuu be ba wura ben temɔ

4 Baa me Yerusalemu ya kpā, ya maa yasu, yen tɔmbu ba ñ dati, ba ñ maa dia banɛ. **5** Yera Yinni Gusunə u doke nən gɔ̄ruən bukurobu mənna ka siri kowobu ka wuun tɔmbu n ka bu gari gari. Ma na tireru garu wa tè səo ba tɔmbun yīsa yorua nge me ben baawuren bweserun tɔka sāa. Bera be ba gbia ba wurama Babilonin di. Ye na wa ba yorua wee.

6 Tɔn be Babilonin sina boko Nebukanesaa u yoru mwɛera u ka da win mi, ben dabiru ta wurama Yerusalemu Yudan temɔ. Ma ben baawure u da win wuuɔ. **7** Wee be ba tɔn be kparama. Bera Sorobabeli ka Yosue ka Neeemi ka Asaria ka Ramia

ka Nakamani ka Maadose ka Bilisani ka Misipaa ka Bigifai ka Nehumu ka Baana. Tən ben geeru ka ben bwese kərin yīsa wee.

⁸ Pareəsin bweseru səə, ba sāawa təmbu nərəbun suba yiru ka wunəbu ka wata ka wəkura yiru (2.172).

⁹ Sefatian bweseru səə, ba sāawa təmbu gooba wunəbu ka wata ka wəkura yiru (372).

¹⁰ Aran bweseru səə ba sāawa təmbu nata ka weeraakuru ka yiru (652).

¹¹ Pakati Məabun bweseru səə, ba sāawa təmbu nərəbun suba yiru ka nəne ka wəkura nəəbu ka ita (2.818). Ba sāawa Yosue ka Yoabun sikadominu.

¹² Elamun bweseru səə, ba sāawa təmbu nərəbu ka goobu ka weeraakuru ka nne (1.254).

¹³ Satun bweseru səə ba sāawa təmbu nəne ka weeru ka nəəbu (845).

¹⁴ Sakain bweseru səə, ba sāawa təmbu nata ka wunəbu ka wata (760).

¹⁵ Binuin bweseru səə, ba sāawa təmbu nata ka weeru ka nəəba ita (648).

¹⁶ Bebain bweseru səə, ba sāawa təmbu nata ka yənda nəəbu ka ita (628).

¹⁷ Asigadin bweseru səə, ba sāawa təmbu nərəbun suba yiru ka gooba wunəbu ka yənda yiru (2.322).

¹⁸ Adonikamun bweseru səə, ba sāawa təmbu nata ka wata ka nəəba yiru (667).

¹⁹ Bigifain bweseru səə, ba sāawa təmbu nərəbun suba yiru ka wata ka nəəba yiru (2.067).

²⁰ Adinin bweseru səə, ba sāawa təmbu nata ka weeraakuru ka nəəbu (655).

²¹ Ateeen bweseru səə, be ba sāa Esekiasin yənugibu ba sāawa təmbu wunəbu yiru sari.

- 22** Hasumun bweseru səə, ba sāawa təmbu gooba wunəbu ka yenda nəəbu ka ita (328).
- 23** Besain bweseru səə, ba sāawa təmbu gooba wunəbu ka yenda nnə (324).
- 24** Harifun bweseru səə, ba sāawa təmbu wunəbu ka wəkura yiru (112).
- 25** Gabaonigibu ba sāawa təmbu wənə ka wəkura nəəbu (95).
- 26** Betelehəmugibu ka Netofagibu ba sāawa təmbu wunaa wənə ka nəəba ita (188).
- 27** Anatətugibu ba sāawa təmbu wunaa teeru ka nəəba ita (128).
- 28** Bəti Asimafətigibu ba sāawa təmbu weerus ka yiru (42).
- 29** Kiriati Yarimu ka Kefiragibu ka Beerətugibu ba sāawa təmbu nata ka wunaa weerus ka ita (743).
- 30** Ramagibu ka Gebagibu ba sāa təmbu nata ka yenda tia (621).
- 31** Mikimasigibu ba sāawa təmbu wunaa teeru ka yiru (122).
- 32** Betəligibu ka Ayigibu ba kua təmbu wunaa teeru ka ita (123).
- 33** Nebo yeənəgibu ba sāawa təmbu weeraakuru ka yiru (52).
- 34** Elamu wiənən yənugibu ba sāawa təmbu nərəbu ka goobu ka weeraakuru ka nnə (1.254).
- 35** Harimun yənugibu ba sāawa təmbu gooba wunəbu ka yendu (320).
- 36** Yerikogibu ba sāawa təmbu gooba wunəbu ka weerus ka nəəbu (345).
- 37** Lodugibu ka Hadidigibu ka Onəəgibu ba sāawa təmbu nata ka wunaa teeru ka tia (721).

38 Senaagibu ba sāawa təmbu nərəbun suba ita ka nənə ka wunaa teeru ka wəkuru (3.930).

39 Wee tən be ba wāa yāku kowobun bweseru səə. Yosuen bweseru səə, Yedayan yenugibu ba sāawa nənə ka wunaa wata ka wəkura ita (973)

40 Imərin yenugibu ba sāawa təmbu nərəbu ka weeraakuru ka yiru (1.052).

41 Pasurin yenugibu ba sāawa təmbu nərəbu ka goobu ka weeru ka nəəba yiru (1.247).

42 Harimun yenugibu ba sāawa təmbu nərəbu ka wəkura nəəbu ka yiru (1.017).

43 Lefiban wuuru səə, be ba sāa Yosue ka Kadimielin bweseru, Hodifan sikadominu, ba sāawa təmbu wata ka wəkura nnə (74).

44 Asafun yenugii be ba ra womu ko sāa yerə, ba sāawa təmbu wunaa weeru ka nəəba ita (148).

45 Be ba sāa gbārarun kənnə kəsobu ba ka sāa Salumun yenugibu ka Atəeba ka Taluməəba ka Akububa ka Hatitaba ka sere Sobaiba ba sāawa təmbu wunaa weeru yiru sari (138).

46 Nətiniban bweseru səə, be ba ra sāa yerun səmburu ko ben sikadobara Siha ka Hasufa ka Tabəstu **47** ka Kerəsi ka Sia ka Padoni **48** ka Lebana ka Hagaba ka Salumai **49** ka Hananu ka Gideli ka Gasaari **50** ka Reaya ka Resini ka Nekoda **51** ka Gasamu ka Usa ka Paseaki **52** ka Besai ka Mehunimu ka Nefisimu **53** ka Bakibuki ka Hakufa ka Haahuru **54** ka Basiliti ka Məhida ka Haasa **55** ka Baakəsi ka Sisera ka Tamaki **56** ka Netisa ka Hatifa.

57 Be ba sāa Saloməən səm kowobun bibun sikadoba, bera Sotai ka Sofereti ka Perida **58** ka Yaala ka Daakoni ka Gideli **59** ka Sefatia ka Hatili ka Pokereti Hasebaimu ka Aməə.

60 Nətini be, ka Saloməən səm kowobun bii be, be kpuro ba kuawa mi təmbu gooba wunəbu ka wənə

ka wəkura yiru (392).

⁶¹ Be ba your wəma saa Teli Melakin di ka Teli Hasaan di ka Kerubu Adonin di ka Iməerin di ba n̄ kpia ba ben tundon yenu gie, ba n̄ maa kpia ba ben bweserun t̄ka wunane bu ka s̄əosi ma ben tii ba s̄āawa Isireliba. ⁶² Ben wirugiba Delaya ka Tobiya ka Nekoda. Be kpuro ba s̄āawa t̄mbu nata ka weeru ka yiru (642).

⁶³ Yāku kowobu s̄ōo, gaba maa wāa be ba n̄ kpia ba ben bweserun t̄ka wunane. Bera Hobayan bibun bweseru ka Hakətugiru ka Baasilaigiru. Ba bwese te soka Baasilai yèn sō ben sikado u Baasilai Galadigiin bii wəndia sua kur̄. ⁶⁴ Bera ba ben bweserun t̄ka kasu ba bia. Ma ba bu yara yāku s̄əmburun di. ⁶⁵ Ma tem men kp̄aro u bu s̄əwa u nee, ma n̄ kun m̄ yāku kowo goo u kpia u bikiaru kua ka urimu ka tumimu ben goo kun yāku dīanu dim̄.

⁶⁶ Tən be kpuron geeru ta s̄āawa t̄mbu nərəbun suba weerus ka yiru ka gooba wunəbu ka wata (42.360) ⁶⁷ ben səm kowobu baasi. Ben səm kowo ben geeru wee, t̄mbu nərəbun suba nəəba yiru ka gooba wunəbu ka tēna ka nəəba yiru (7.337). Be s̄ōo, wom kowobu goobu ka weerus ka nəəbu (245) ba wāa tən durəbu ka tən kurəbu. Ben dumin geera s̄āawa nata ka wunaa teeru ka wəkura nəəbu ka tia (736) ka sere birakəsu goobu ka weerus ka nəəbu (245) * ⁶⁸ ka yooyoosu neeru ka tēna ka nəəbu (435) ka sere ketekunu nərəbun suba nəəba tia ka nata ka wunaa teeru (6.720). ⁶⁹ Yenu yērobu dabina ba kēnu kua bana yen sō. Wee ye tem men kp̄aro u maa

* **7:67** (245) - Esidarasin tireru s̄ōo, 2:66, ba nee, ba dum 736 ka birakəsu 245 m̄. Adama Neeemin tireru s̄ōo, ba n̄ ye yorua.

wẽ bana yen sõ. U wuran gobi nõrõbu (1.000) wẽ ka gbẽenu weeraakuru ni ba koo ka yaa yem yẽka ka yãku kowobun takoba neera wunõbu ka tõna (530). **70** Yenu yero ben kẽe ni ba kua nu sãawa wuran gobi nõrõbun suba yendu (20.000) ka sii geesu kilo nõrõbu ka wunõbu (1.100). **71** Tõn be ba tie ba maa wuran gobi nõrõbun suba yendu (20.000) wẽ ka sii geesu kilo nõrõbu (1.000) ka sere yãku kowobun takoba wata ka nõoba yiru.

72 Yãku kowobu ka Lefiba ka gbãra kõnnõ kõsobu ka wom kowobu ka Netiniba ka sere Isireli be ba tie ben baawure u wurawa win wuuõ.

Esidarasi u woodan tireru gara

batuma sõõ

Wõõn suru nõoba yirusen tõõ gbiikiru sõõ, Isireliba kpuro ba wää ben wuso.

8

1-2 Suru nõoba yirusen tõõ gbiikii te sõõ, yera Isireliba kpuro ba nõõ tia kua ba menna Yerusalemõa gbärarun kõnnõwõ ge ba sokumõ Nim kõnnõ. Ma ba Esidarasi wi u sää wooda yero kana u ka tireru na mi ba wooda yorua ye Yinni Gusunõ u Mõwisi wẽ be, Isireliban sõ. Ma Esidarasi u ka tire te na tõn ben wuswaaõ tõn kurõbu ka tõn durõbu ka bibu be ba koo kpõ bu tubu ye ba gerumõ gesi.

3 Ma u bu tire te gariammé saa bururun di sere ka sõõ wii wõllõ batuma ye ya wää kõnnõwõ ge ba sokumõ Nim kõnnõ. Ma be kpuro ba nùn swaa daki.

4 N deema ba turaru garu kua ka dää. Miya Esidarasi u yõowa u yõra u ka tire te garimõ. Ma gabu ba yõ win nõm geuõ. Bera Matitia ka Sema ka Anaya ka Uri ka Hilikiya ka Maseya. Gaba maa wää

win nəm dwarə, bera Pedaya ka Mikaeli ka Maakiya ka Hasumu ka Hasabədانا ka Sakari ka Mesulamu. ⁵ Təmbu kpuro ba nùn waamə. Domi u yɔwa u bu gunum kere. Sanam me u tire te wukia tən ben nəni biru, yera ba seewa ba yɔra. ⁶ Yera u Gusunə Yinni boko siara. Ma be kpuro ba nəma yiiya ba nee, ami, ami! Ma ba kpuna temə ba Gusunə sāwa. ⁷ Ye ba seewa tem di, saa yera Lefi beni, Yosue ka Bani ka Serebia ka Yamini ka Akubu ka Sabetai ka Hodiya ka Maseya ka Kelita ka Asaria ka Yosabadi ka Hananu ka Pelaya, ba bu wooda ye tubusiamə. ⁸ Lefi be, ba wooda ye gariməwa sāa sāa ma ba ye tubusiamə nge me ya koo ka təmbu yeeri.

⁹ Sanam me tən be, ba tire ten gari nəəmə, ba suməwa. Adama Neeemi ben kparo ka Esidarasi wi u sāa yāku kowo ka wooda yēro ka Lefi be ba wooda ye tubusiamə mi, ba bu sə̄wa ba nee, sa təo teni yiwa su ka Gusunə besen Yinni sā. Yen sō, i ku nuki sankira i n sumə.

¹⁰ I gəsiro bəen yənusə kpa i dīa geenu di kpa i tam durom nə. Kpa i ka be ba n̄ dīanu səəru kue bəeginu bənu ko. Domi sa təo teni yiwa su ka besen Yinni sā. I ku nuki sankira. Nuku doo bi Yinni Gusunə u koo bəε wē bu koo bəε dam kē.

¹¹ Lefi be, ba maa bu nukuru yemiasia ba nee, i sinə səε. Sa təo teni yiwa su ka Yinni Gusunə sā. I ku nuki sankira.

¹² Saa yera be kpuro ba gəsira ba da ben yənusə ba di ba nəra, ba ka be ba n̄ dīanu mə beginu bənu kua. Ma ba nuku doo bakabu kua. Domi tire te ba gara mi, ten gari bu yeeri.

13 Yen sisiru, yenu yero bu kpuro ka yaku kowobu ka Lefiba ba menna Esidarasin mi, wi u saa wooda yero u ka bu wooda ye tubusia. **14** Yera ba wa wooda yen gaa soa ye Yinni Gusunon Mowisi we mi, ya nee, Isireliba ba ko n da n wawa kunu soa ba n Kunun tso bakaru mo suru nooba yiruse soa. **15** Kpa bu kpara wuu baagere kpuro soa ka Yerusalem bu nee, tombu bu doo guuno bu olifi ye ba duura ka ye ba n duuren wurusu kasuma ka daa wuru bakasu ka sere maa kpakpa wurusu bu ka kunu ko nge me ya yorua wooda ye soa.

16 Yera ton be, ba da ba daa wuru si kasuma ba ka kuu ni gira, gabu ben dii teeran wollo, gabu ben yenu yaara, gabu Yinni Gusunon saa yerun yaara, gabu konnawo ge ba ra soku Nim konno, gabu maa konnawo ge ba mo Efaraimu. **17** Ton be ba wema yorun di mi kpuro, ba kunu girawa. Ma ba sina mi. Yen dema te, ba nuku doo bakabu kua. Domi Isireliba ba n tso baka te koore nge me, saa min di Yosue Nunin bii u gu. **18** Ba ra wooda yen wiru garu gariwa tso baka ten tso baatere sere ta ka kpa. Ba tu diwa sso nooba yiru. Nooba itase ma ba menna siki siki ba ka tu wiru go nge me wooda ya gerua.

Isireliba

ba ben durum tuuba kua

9

1 Suru nooba yiruse, yen sso yenda nnese soora Isireliba kpuro ba menna bu ka noa bke. Ma ba saaki deewa ba tii tua wisi wiru nuku sankirarun ss. **2** Be ba saa Yuuba gesi, ba tii wiia ton tukobun sunu soon di ba na ba ben durum ka ben sikadobagia tuuba kua. **3** Yen biru, ba bu Yinni Gusunon gari

garia kɔba itan saka ba yɔ ba swaa daki. Ma ba yiira wi, ben Yinnin wuswaaɔ ba suuru kana sere kɔba ita maa.

⁴ Yera Yosue ka Bani ka Kadimieli ka Sebania ka Buni ka Serebia ka Bani goo ka Kenani ba yɔɔwa tura ten mi. Ma ba nɔɔgiru sua Gusunɔ ben Yinnin mi gia ba somiru kana. ⁵ Yera Lefi beni, Yosue ka Kadimieli ka Bani ka Asabinia ka Serebia ka Hodiyə ka Sebania ka Petaya ba nεε, i seewo i Gusunɔ besen Yinni siara sere ka baadommaw. Baawure u nùn siaro win yisi bεerεgirun sɔ, baa me i n̄ gari yε yi i ko i ka nùn siara.

Kana te ba kua

⁶ Ma Isireliba ba kana teni kua ba nεε, Yinni, wunε turowa a sãa Gusunɔ. Wuna a wɛllu kua ta kpā. Wuna a maa kperi kua too. Wuna a tem taka kua ka ye ya wāa me sɔɔ. Wuna a nim wɔku kua ka ye ya wāa ge sɔɔ. Wuna a hunde koni kpuro wāaru wε. Ma kperi ka suru ka sɔɔ, ye kpuro ya nun bεerε wɛemw.

⁷ Yinni Gusunɔ, wuna a Aburamu gɔsa. Ma a dera u seewa Urin di, Kaladen temɔ. Yen biru, ma a nùn yisi kpaaru kā Aburahamu.

⁸ A wa ma u sãa naanegii, ma a ka nùn arukawani bɔkua a nεε, kaa nùn tem me wε mè sɔɔ Kananiiba ka Hetiba ka Amɔreba ka Feresiba ka Yebusiba ka Girigasiba ba wāa, kpa win bibun bweseru tu sina mi. Meyə a maa wunen arukawani ye yibia. Domi a sãawa naanegii.

⁹ Sanam me besen baababa ba wāa Egibiti,

a ben nəni swāaru wa.
 Ba nun somiru kana,
 ma a ben wuri nua nim wōku ge ba mō Naa yario.

10 A yē nge me Egibitigibu ba besen baababa dam
 dore ka nuku kōsuru.
 Ma a sōm maamaakiginu kua a ka ben suno
 ka win sina asakpəbu ka win təmbu kpuro seesi.
 Ma a yīsiru yara sere ka gisən giso.

11 A dera nim mu burana besen baaba ben
 wuswaaə.
 Ma ba təbura tem gbebum soə.
 Adama Egibitigii be ba bu naa gire,
 a bu sure nim bwerō.
 Ma ba numa nge kpee te ba kare nim soə.

12 Sōa soə, guru wii wurora a ra ka wunen tōn be
 kpare.
 Wōkuru maa, kpa ta n ka dō yari bakaru weene,.
 ta n bu yam bururasie swaa soə.

13 A sarama saa wəllun di,
 ma a ka bu gari kua Sinain guuro.
 A bu wooda gea ka sōosi geenu wē.

14 A dera wunen sōm kowo Mōwisi u bu tō
 wērərugiru wē
 te ta sāa nənəm wunen sō.
 Ma a dera u bu wooda ye ya tie sōosi.

15 A bu dīanu wēema saa wəllun di
 sanam me gōra bu mō.
 Ma a dera nim mu yara kpee baan di
 sanam me nim nəru ga bu mō.

Ma a nee, bu doo bu tem me mwa
 mēn nōo mwēeru a bu kua ka bōri.

16 Adama besen baaba be, ba tii sua ba nun seesi.
 Ba n̄ wunen woodaba mēm nōowē.

17 Ba swaa taaya
 ba wunen sōm maamaakigii ni duari

ni a bu kua.
 Ma ba nun seesi ba tii kparo kua
 bu ka wura mi ba raa yoru di.
 Adama ka me, a ñ bu deri.
 Domi a sãawa Yinni
 wi u ra tønu suuru kue.
 A wønwøndu ka durom mœ.
 Wunen mœru ku ra fuuku se.
 Wunen kíru ta ñ kpeemœ sere ka baadommaœ.

18 Ka me kpuro, ba tii bũu wuraguu kua.
 Ma ba nœgiru sua ba nee,
 gera ga sãa ben yinni
 wi u bu yarama Egibitin di.
 Nge meya ba kua ba ka nun wønwa.

19 Adama wunen kñi bakarun sœ,
 a ñ bu deri gbaburœ.
 Guru wii wuro te ta bu swaa gbiyiye mi,
 wðkuru ka sœ œœ, ta ñ bu deri.

20 Wunen kírun saqbu,
 a bu wunen Hunde wœ
 ba n ka bwisi mœ.
 Baadomma a ra bu dñanu wœ
 ni ba ra soku manna bu di,
 kpa a bu nim wœ bu nœ.

21 A bu nœori gbaburœ wœœ weeru,
 ba ñ gãanu biare,
 ben yãnu kun gëekirare,
 ben naasu kun maa mœsire.

22 A bu bwese tukunu ka nin sinambu nœmu sœndia
 ka be ba kœ bu sikerenœn tem.
 Meyä Hesibonin tem mi Sihoni u bandu dii
 ka Basanin tem mi Ogu u bandu dii.

23 A dera ba bibu mara ba dabia nge kperi.
 Ma a dera ba dua Kananin temœ
 me a ben baababa nœœ mwœeru kua.

24 Ma ba Kananiba kamia
 ba bu taare ba ben tem me mwa.
 Ma ba bera min sinambu ka min bwesenu kpuro
 kua nge me ba kī.

25 Ba wuu gbārarugisu mwεera ka mi tem gem wāa,
 ka yεnu si su dukia mō, ka dēkəba ka resεm gbaanu,
 ka olifiba ka dāa dabu nīn marum ba ra di.
 Yinni Gusunø, wunen kīrun saabuwa
 ba ka di ba deba ba bəria.
 Ma ba wāa doo nəəru səə.

26 Adama ka me, ba ñ nun mem nəəwε.
 Ba nun seesiwa, ba wunen woodaba biru kisi.
 Ma ba wunen səməbu go go
 be ba bu kirø kua bu ka gōru gəsia
 bu ben daa kōsa deri kpa bu wurama wunen mi.
 Adama ba ben daa kōsa sosiwa.

27 Saa yera a bu yibereba nəmu səndia,
 ma ba bu dam dore.
 Adama ben nəni swāaru səə, ba nun nəəgiru sue.
 Ma a ben nəə nua saa wəllun di.
 A bu təmbu seeya
 bu ka bu wəra saa yibere ben nəman di
 wunen kīi bakarun səə.

28 Adama ye ba wāa bəri yendu səə,
 ba maa wəri ben durum səə.
 Ma a bu biru kisi,
 a bu yibereba nəmu səndia.
 Yera ba maa kpam nəəgiru sua
 ba nun somiru kana.
 Ma a ben nəə nua wəllun di,
 a bu wəra nən dabinu wunen kīrun saabu.
29 Yen biru, a bu kirø kua
 bu wunen woodaba mem nəəwa.
 Adama ba tii sua ba ñ ye mem nəəwε,
 baa me yera ya ra tənu wāaru wē

wi u ye mém nœwa.

Ba swaa taayawa ba ye yina mam mam.

30 A ka bu temqna wœ dabinu.

A wunen sœmœbu wunen Hunde wœ
ba n ka bu kirœ mœ.

Adama ba n swaa daki.

Ma a bu bwese tukunu nœmu bœria.

31 Adama wunen kïi bakarun sœ,

a n bu go, a n maa bu deri,

domi a sœawa Yinni wœnwœndugii ka duromgii.

32 Gusunœ besen Yinni, a kpœ, a maa dam mœ.

Wuna a durom bakam mœ.

Ma a wunen arukawani nœni ye a ka sun bœkua.

A besen wahala meorio ye sa mœ

bœse ka besen sinambu ka ben sina asakpœbu

ka wunen sœmœbu ka besen yœku kowobu

sœ Asirin sinambun waatin di sere n ka gisœ girari.

33 A sœawa naanegii.

A maa kuawa dee dee gœa ni nu sun deema sœ.

Adama bœse, sa kuawa naane sarirugibu.

34 Besen sinambu ka ben sina asakpœbu

ka besen yœku kowobu ka besen baababa

ba n wunen woodaba mém nœwœ.

Ba wunen kirœba atafiru kuawa.

35 Ba n nun sœwa.

Ba n maa ben daa kœsa deri,

baa me a bu tem bakam wœ me mu gea sœa,

ba kua men sinambu.

Ma a bu nœri ba wœa doo nœru sœa.

36 Yen sœ, bœse wee sa yoru dimœ gisœ

tem me a bu wœ sœ

bu ka men dœa geenu di.

37 Dœa gee ni, nu kua sinam be ba sun yoru di-
isiamœginu.

Ba sun mœ bœse ka besen yaa sabenu.

Ba ka sun mò nge më ba kī besen durum sō.
Ma sa wāa nuku sankira bakanu sōo.

*Isireliba ba nōo mwēeru kua
bu wooda mēm nōowa*

10

¹ Yeniba kpuron sōna besen Isireliba sa nōo mwēeru kua sa yorua. Besen wirugibu ka Lefiba ka yāku kowobu ba besen nōo mwēe ten tireru nōma dokewa.

² Be ba tire te nōma doke, bera besen kparo Neemi, Hakalian bii, ³ ka Sedesiasi ka Seraya ka Asaria ka Yeremi

⁴ ka Pasuri ka Amaria ka Maakiya ⁵ ka Hatusi ka Sebania kā Maluku ⁶ ka Harimu ka Mēremētu ka Abudiasi ⁷ ka Danieli ka Ginētoni ka Barukū ⁸ ka Mesulamu ka Abia ka Miyamini ⁹ ka Maasia ka Biligai ka Semaya. Be kpuro ba sāawa yāku kowobu.

¹⁰ Be ba sāa Lefiba, bera Yosue, Asanian bii ka Binui, Henadadin bii ka Kadimeli ¹¹ ka ben mero bisibu Sebania ka Hodiya ka Kelita ka Pelaya ka Hanani ¹² ka Misee ka Rehēbu ka Hasabia ¹³ ka Sakuri ka Serebia ka Sebania ¹⁴ ka Hodiya ka Bani ka Beninu.

¹⁵ Be ba maa sāa wirugibu beya Pareesi ka Pakati Mōabu kā Elamu ka Satu ka Bani ¹⁶ kā Buni ka Asigadi ka Bebai ¹⁷ ka Adoniya ka Bigifai ka Adini ¹⁸ ka Atēe ka Esekiasi ka Asuri ¹⁹ ka Hodiya ka Hasumu ka Besai ²⁰ ka Harifu ka Anatōtu ka Nebai ²¹ ka Magipiasi ka Mesulamu ka Hesiri ²² ka Mesesabeli ka Sadēku ka Yadua ²³ ka Pelatia ka Hananu ka Anaya ²⁴ ka Hosee ka Hanania ka Hasubu ²⁵ ka Halosesi ka Pilika ka Sobeki ²⁶ ka

Rehumu ka Hasabuna ka Maaseya ²⁷ ka Akiya ka Hananu ka Anani ²⁸ ka Maluku ka Arimu ka Baana.

²⁹ Tən be ba tie, yāku kowobu ka Lefiba ka sāa yerun kōnnōn kōsobu ka wom kowobu ka Netinibā ka sere be ba ka tii wurama tən tukobun min di ba Yinni Gusunən woodaba mem nəəwe ka ben kurəbu ka bibu, be ba gesi bwisi ka yēru mə, ³⁰ be kpuro ba ka ben mero bisibu nəə tia kua be ba tən giroru bo. Ba nəə mwəeru kua ka bəri ba nəε, ba koo Yinni Gusunən wooda mem nəəwa ye u bu wē saa Məwisin min di kpa ba n ka yi səmburu mə.

³¹ Ba nəε, ba n̄ maa ben bii wəndiaba tən tukobu wēemə bu sua kurəbu. Meyə ben aluwaasiba ba n̄ maa tən tukobun bii wəndiaba suamə kurəbu. ³² Meyə ba n̄ maa gāanu dwemə təo wērarugiru ka təo bakanun saa səə tən tukobu bà n ka kiaru na. Ba koo maa təmbu yoru kara wōə nəəba yiruse səə kpa ba kun gāanu kəsie. ³³ Meyə ba tii wooda yiyya bu kēnu wē sii geesun gobi garamu nne wōə ka wōə bu ka Gusunə ben Yinnin sāa yerun səmburu ko. ³⁴ Kēe ni, nu ko n sāawa ni ba koo ka pēe dwe Yinni Gusunən yāku ninin sō. Niya, yāku dōə mwaararuginu ka yāku ni ba ra ko təo wērarugiru səə ka yāku ni ba ra ko təo baatere ka ni ba ra ko suru kpao ù n yara ka yākunu ganu ka sere torarun yākunu. Kēe niya nu koo maa somi bu ka sāa yerun səma baayere ko. ³⁵ Yāku kowobu ka Lefiba ka Isireliba bəse kpurowa sa tətə toba su ka wa dāa ye sa ko n da ka ne wōə baagere yākunun sō Gusunə bəsen Yinnin sāa yera yen saa yà n tunuma. Dāa yera ba ko n da ka yāku dōə sōre yāku yera wəllə nge me ba gerua woodan tireru səə. ³⁶ Meyə sa Gusunə nəə mwəeru kua sa nəε, sa ko n da ka bəsen gberun dīa gbiikinu ka bəsen dāa marum gbiikum

be ba səmburu mò yāku yero nāawē Yinni Gusunən sāa yero³⁷ ka besen bii gbiikobu ka sere maa besen yaa sabenun bii gbiikinu nge mē ba yoruə woodan tireru səo.³⁸ Meyə sa ko maa ka bu besen som kpam ka besen dāa marum gbiikum ka besen tam kpam ka besen gum kpam naawa. Sa maa nəə mwəeru kua sa nəe, sa ko wəkuru baateren wəllə tia wē besen gbean dīanu səo. Lefiban tiiwa ba koo ye mwəeri wusu kpuron di tem mè səo sa gbea mo.³⁹ Yāku kowo wi u sāa Aronin bweseru wiya u koo Lefiba yōsiri sanam mē ba koo wəkuru baateren wəllən tia tia ye mwa. Kpa Lefi ben tii bu maa ka ye ba mwə min wəkuru baateren wəllən tia tia na Gusunə ben Yinnin sāa yero diru mi ba ra arumani bere.⁴⁰ Isireliba ka Lefiba ba koo ka ben kēnu nawa mi ba ra yākunun dendì yānu bere Yinni Gusunən sāa yero ka sere mi yāku kowobu ka sāa yerun kōsobu ka wom kowobu ba ra səmburu ko. Kēe niya alikama ka tam kpam ka gum.

Nge meya sa ñ maa ka Yinni Gusunən sāa yeru derimə.

*Yuu be ba wurama
ba sina Yerusalemuə*

11

¹ Isireliban wirugiba da ba sina Yerusalemuə. Ma ba tete toba bu ka tən tia tia wuna Isireli be ba tien wəkuru baateren wəllə. Bera ba koo sina Yerusalemu wuu deerə ge səo, kpa nəəba nnə be ba tie bu da wuu si su tien mi.² Be ba gōru doke ka kīru bu ka sina Yerusalemu mi, təmba bu domaru kua.

³ Isireliban berin wirugibu ba da ba sina Yerusalemuə ma Isireli be ba tie ka yāku kowobu

ka Lefiba ka Netiniba ka sere Salomoen som kowobun bibu ba da ba sina Yudan temo ben wuso. ⁴⁻⁵ Yudaba ka Benyameeba gaba ba sina Yerusalemuo.

Be ba saa Yudaba bera Ataya ka Maaseya, Osiasin bii. Ataya u saawa Sakarin debubu. Win sikadobara Sakari ka Amaria ka Sefatia ka Mahalaleeli ka Peresi. Maaseya u maa saawa Barukun bii. Win sikadobara Kolohose ka Hasaya ka Adaya ka Yoyaribu ka Sakari ka Siloni. ⁶ Peresin sikadominu be ba sina Yerusalemuo ben geera saawa tømbu neeru ka wata ka nøeba ita (468). Ba saawa tabu durø wørugøba.

⁷⁻⁸ Benyamee be ba sina Yerusalemuo, bera Salu ka Gabai ka Salai. Salu u saawa Mesulamun bii, Yoedin debubu. Win sikadobara Pedaya ka Kolaya ka Maaseya ka Itiel i ka Esai. Be ba saa Benyameen bweseru ba ka sina Yerusalemuo ben geera saawa tømbu nene ka wunaa teeru ka nøeba ita (928). ⁹ Yoeli Sikirin biiwa u saa ben kparo. Ma Yuda Senuan bii u maa saa ben wirugii yiruse.

¹⁰ Yaku kowo be ba maa singa Yerusalemuo bera Yedaya, Yoyaribun bii ka Yakini, ¹¹⁻¹⁴ ka Seraya, Hilikiyan bii, Mesulamun debubu, Sadoku ka Merayetu ka Akitubu wi u raa saa yaku kowo tønweron sikadobu, ka sere tømbu wene ka yenda yiru (822) be ba ra n somburu mo Yinni Gusunon saa yero, ka Adaya Yerohamun bii, Pelatian debubu, Amusi ka Sakari ka Pasuri ka Maakiyan sikadobu, ka sere tømbu goobu ka weeru ka yiru (242), be kpuro yenu yero, ka Amasai, Asarelin bii, Akusain debubu, Mesilemetu ka Imerin sikadobu, ka tabu durø wørugøba wunaa

teeru ka nɔɔba ita (128). Sabudielie Gedolimun biwa u sãa ben wirugii.

¹⁵ Lefi be ba maa da Yerusalemuo, bera Semaya, Hasubun bii, Asirikamun debubu, Hasabia ka Bunin sikadobu, ¹⁶ ka Sabetai ka Yosabadi be ba sãa sãmbu te ba ra ko yaaraen guro gurobu, ¹⁷ ka Matania, Miseen bii, Sabudin debubu, Asafun sikadobu, wi u ra womu gbi bà n Gusuno siaramo kanarun saa, ka win wənə turo Bakibukia wi u ra nùn somi, ka Abuda, Samuan bii, Galalin debubu, Yedutum sikadobu. ¹⁸ Lefi be ba wāa Yerusalemuo kpuro ben geera sãawa tɔmbu goobu ka wene ka nne (284).

¹⁹ Be ba ra sãa yerun kənnə kɔsu, bera Akubu ka Talumoo ka wigibu. Be kpuron geera sãawa wunaa wata ka wəkura yiru (172).

²⁰ Isireli be ba tie, ka yãku kowobu ka Lefiba ba da ba sinawa Yudan wusu kpuro səo, ben baawure u wāa win temo. ²¹ Nətiniba ba da ba sinawa gunguno. Ben wirugiba Sisa ka Gisipa.

²² Lefiban wirugii wi u sina Yerusalemuo win ȳisira Usi, Banin bii, Hasabian debubu. Win sikadobara Matania ka Misee, Asafun bweseru səo. Asafun bwese te, ta sãawa te ta ra womu ko Yinni Gusunon sãa yero. ²³ Sina boko u wom kowo be wooda yiyya ye ba koo swi ka sere maa səma ye ba ko n da ko tɔ baatere.

²⁴ Petaya, Mesesabelin bii, Serakin debubu, Yudan sikadobu, wiya u sãa Isireliban səmo Pəesiban sina bokon mi.

Yuu be ba wāa wuu si su tie səo

²⁵ Yudaba ba da ba sina wuu sini ka sin baru kpaanu səo. Wuu siya Kiriati Aribə ka yen baru kpaanu ka Diboni ka yen baru kpaanu ka Yokaseeli

ka yen baru kpaanu ²⁶ ka Yesua ka Məlada ka Beti Paleti ²⁷ ka Hasaa Suali ka Beri Seba ka yen baru kpaanu ²⁸ ka Sikilagi ka Mekəna ka yen baru kpaanu ²⁹ ka Eni Riməo ka Sorea ka Yaamuti ³⁰ ka Sanəa ka Adulamu ka yen baru kpaanu ka Lakisi ka yen baru kpaanu ka Aseka ka yen baru kpaanu. Ba sinawa Beri Seban di n ka da Hinəmun wəwəa.

³¹ Benyameeba ba da ba sinawa Geban di n ka da Mikimasiō ka Ayaō ka Betelio ka yen baru kpaano ³² ka Anatatuə ka Nəbuə ka Hananiaə ³³ ka Hasoriō ka Ramao ka Gitaimua ³⁴ ka Hadidiō ka Seboimua ka Nebalatiō ³⁵ ka Lodua ka Onəo ye ba maa sokumə nəman səm kowobun wəwa.

³⁶ Lefiba səo, be ba wāa Yudaō, ben gaba seewa ba wura Benyameeban temə.

Lefiba ka yāku kowobun yīsa

12

¹ Yāku kowobu ka Lefi be ba Sorobabeli Salatielin bii ka Yosue swīima ba ka na Yerusalemə, bera Seraya ka Yeremi ka Esidarasi ² ka Amaria ka Maluku ka Hatusi ³ ka Sekania ka Rehumu ka Məremətu ⁴ ka Ido ka Ginətoi ka Abia ⁵ ka Miyamini ka Maadia ka Biliga ⁶ ka Semaya ka Yoyaribu ka Yedaya ⁷ ka Salu ka Aməku ka Hilikiya ka Yedaya. Bera ba sāa yāku kowobu ka be ba bu somimən wirugibu Yosuen waati. ⁸ Be ba sāa Lefiba, bera Yosue ka Binui ka Kadimieli ka Serebia ka Yuda ka Matania. Matania wi, ka win təmba ba ra siarabun womusu ko. ⁹ Bakibukia ka Uniwa ba ra səmburu ko ben mero bisibu Lefi ben bəkuə.

¹⁰ Yosuewa u Yoyakimu mara. Ma Yoyakimu u seewa u Eliasibu mara. Ma Eliasibu u seewa u

Yoyada mara. ¹¹ Yoyada u maa seewa u Yonatam mara. Ma Yonatam u seewa u Yadua mara.

¹² Be ba sāa yāku kowobu Yoyakimun waati ye sāo, ba ka sāa yēnu yērobu, bera Meraya, Serayan bweseru sāo ka Hanania, Yeremin bweseru sāo, ¹³ ka Mesulamu, Esidarasin bweseru sāo, ka Yukanani, Amarian bweseru sāo, ¹⁴ ka Yonatam, Melukin bweseru sāo, ka Yosefu, Sebanian bweseru sāo, ¹⁵ ka Adina, Harimun bweseru sāo, ka Helikai, Merayatun bweseru sāo, ¹⁶ ka Sakari, Idon bweseru sāo, ka Mesulamu, Ginetonin bweseru sāo, ¹⁷ ka Sikiri, Abian bweseru sāo, ka Pilitai, Minyamini ka Maadian bweseru sāo, ¹⁸ ka Samua, Biligan bweseru sāo, ka Yonatam, Semayan bweseru sāo, ¹⁹ ka Matinai, Yoyeribun bweseru sāo, ka Usi, Yedayan bweseru sāo, ²⁰ ka Kalai, Salain bweseru sāo, ka Ebēe, Amekun bweseru sāo, ²¹ ka Hasabia, Hilihiyan bweseru sāo, ka Netaneeli, Yedayan bweseru sāo.

²² Tən bèn waati sāo ba Lefi be ba sāa yēnu yērobu ka yāku kowobun yīsa yorua tireru sāo n ka da Darusi Peesiban sina bokon bandun waati sāo, bera Eliasibu ka Yoyada ka Yukanani ka Yadua.

²³ Adama ba Lefi be ba sāa yēnu yērobun yīsa yorua yerukobun garin tireru sāo sere Yukanani, Eliasibus biin waati sāo təna.

²⁴ Lefiban yēnu yēro beni, Hasabia ka Serebia ka Yosue, Kadimielin bii, bera ba ra womusu ko bu ka Gusuno siara kpa Lefi be ba tie ba n wuramō nge mē Dafidi Gusunən sām kowo u gerua.

²⁵ Be ba maa sāa sāa yerun kānnōn kāsobu, bera Matania ka Bakibukia ka Abudiasi ka Mesulamu ka Talumōo ka Akubu. ²⁶ Be kpurowa ba wāa Yoyakimu, Yosuen bii, Yosadakin debubun waati

səo. Beya ba maa wāa Neeemi wi u sāa kparo ka Esidarasi wi u sāa yāku kowo ka tire yoron waati səo.

Ba Yerusalemun gbāra ten

wii goberun tōo bakaru di

27 Sanam me ba Yerusalemun gbāra ten wii goberun tōo bakaru dimə, ba da ba Lefiba mennama beri berikan di mi ba raa wāa kpa bu ka tōo te di nuku dobu səo ba n womusu mè ba n seketirenu ka mərəkunu ka gōogenu soomə. **28-29** Wom kowo be ba wāa Yerusalemun baru kpaanə ka be ba wāa Netofaə ka Bəti Giligaliə ka Geban baru kpaanə ka Asimafetiə ba mennama dəma te, domi wom kowo be, ba tii yenusu kuawa Yerusalemun bəkuə. **30** Yāku kowobu ka Lefiba ba tii deerasia. Ma ba maa təmbu ka kənnəsu ka gbāraru deerasia.

31 Ne, Neeemi, na dera Yudaban wirugibu ba yəəwa gbāraru wəllə ma ba wom kowobu bənu kua wuuru yiru. Bənu gbiikaa ya sīa ya da nəm geu già gbārarun kənnəwə ge ba mè Kubanu. **32** Ma Hosee ka Yudaban wirugibun bənu ba wom kowo be swīi biruə. **33** Yen biruwa tən beni ba maa swīi. Bera, Asaria ka Esidarasi ka Mesulamu **34** ka Yuda ka Benyamee ka Semaya ka Yeremi **35** ka yāku kowobun bii be ba kəbi nəni ka Sakari, Yonatam bii, Semayan debubu, Matania ka Misee ka Sakuri ka Asafun sikadobu, **36** ka sere win təmbu Semaya ka Asareli ka Milalai ka Gilalai ka Mai ka Netaneeli ka Yuda ka Hanani. Tən be, ba mərəkunu nəni ni Dafidi Gusunən səm kowo u kua. Ma Esidarasi tire yoro u bu swaa gbikiye. **37** Ye ba tunuma kənnəwə ge ba mè Bwia, yera ba da Dafidin wuun yəə yero ma ba yəəwa gana yen wəllə ba ka Dafidin sina kpaaru

tuke, ma ba da kənnəwə ge ba mə Nim, sə̄o yari yeru
gia.

³⁸ Wom kowobun bənu yiruse ya maa sīa ya da
nəm dwaru gia. Ma ne ka tən be ba tie sa bu swīi
biruə. Ma sa da ka wuu kəsu yee te ba mə Pēen
də̄o sə̄ru yerun gāarə sere ka gbāra te ta yasun bera
gia ³⁹ ka kənnə ge ba mə Efaraimuə ka kənnəwə ge
ba sokumə Təkə sere ka kənnəwə ge ba mə Swēe
ka wuu kəsu yee te ba mə Hananeeelin bəkuə ka
te ba mə Mean bəkuə sere ka kənnəwə ge ba mə
Yāanu. ⁴⁰ Ma wom kowo be kpuro ba da ba yə̄ra
Yinni Gusunən sāa yero. Ma nən tii na yə̄ra mi ka
siri kowo be ba man swīi ⁴¹ ka yāku kowo beni,
Eliakimu ka Maaseya ka Minyamini ka Misee ka
Elionai ka Sakari ka Hanania be ba kəbi soomə
kpuro ⁴² ka sere maa Maaseya ka Semaya ka Eleasaa
ka Usi ka Yukanani ka Maakiya ka Elamu ka Esse.
Ma wom kowobu ba womusu mə. Yisirayawa u bu
kpare.

⁴³ Yen tə̄ te, təmba yāku dabi dabinu kua ma
ba nuku dobu kua. Domi Gusunə u bu nuku doo
bakabu wē. Kurəbu ka bibun tii ba nuku dobu kua
ma Yerusaləmun di nuku dobun kuuki yi nə̄ra n
toma.

Ye n sāa yāku kowobu

ka Lefiban bənu

⁴⁴ Yen tə̄ te, ba təmbu gəsa bu ka dia kəsu mi
ba ra kənu ka dīa gbiikinu yi ka sere tia tia ye ba
ra Yinni Gusunə wē ben mərun wəkuru baateren
wollo. Ma ba tən be yiire bu dīa ni mwəeri wusun di
ni ba koo yāku kowobu ka Lefiba wē nge me wooda
ya gerua. Yudaba ba nuku dobu mə yèn sə̄ yāku
kowobu ka Lefiba ba wura ben səmburu sə̄, ⁴⁵ ba

Yinni Gusunən sāa yerun wooda mēm nōowammē ba təmbu dēerasiamō. Meyə wom kowobu ka sāa yerun kənnən kōsobu ba maa wooda ye kpuro mēm nōowammē nge mē Dafidi ka win bii Saloməo ba gerua. ⁴⁶ Domi yellu Dafidi ka Asafun waati wom kowoba wāawa be ba ra siarabun womusu ko Yinni Gusunən sō. ⁴⁷ Sorobabeli ka Neeemin waati sōo, Isireliba kpuro ba ra wom kowobu ka sāa yerun kənnən kōsobu ka Lefiba ben dīanu wēwa tōo baatere. Kpa Lefi be, bu maa Aronin bibun bweseru wē ye ya sāa begia.

Neeemi u gāa dabinu kōsa

13

¹ Saa ye sōo, ba gara woodan tire te Mōwisi u yoruə sōo Isireliba kpuron wuswaaə ma ba deema ba yoruə ba nēe, n n̄ koorə Aməniba ka Məabuba ba n wāa Gusunən təmbu Isirelibaŋ suunu sōo. ² Domi Məabu be, ka Aməni be, ba n̄ Isireliba sennə de ka dīanu ka nim. Yen biru, ba maa Balamu sokusia u Isireliba bōrusi kpa bu nūn gobi kəsia. Adama Gusunə besen Yinni u bōri yi gəsia domaru. ³ Sanam mē ba woodan tire ten gari nua, yera be, Isireliba ba sōbu kpuro wuna ben suunu sōon di.

⁴ N deema ba raa yāku kowo Eliasibu gəsə u ka Gusunə besen Yinnin sāa yerun dia ye ba gəri gərin səmburu ko. Eliasibu wi, u sāawa Tobiyan dusi. ⁵ Yera u nūn dii bakaru gəsia mi ba ra raa kēnu yi ka turare ka sāa yerun dendı yānu ka yāku kowobun dīa ni ba ra bu wē ka alikaman bōnu tia ye ba mwa wokuru baateren wəllə ka tam kpamgia ka gumgia ka dīa ni ba ra Lefiba ka wom kowobu ka kənnən kōsobu wē.

6 Nε, Neeemi na n wāa Yerusalemwā sanam mε ye kpuro ya koora. Domi saa ye sōo, na ḡosirawa Babilonin sina boko Aatasesin mi. N deema saa ye, win bandun wōo tēna ka yiruse sōora mi. **7** Wōo gen kpeeru sōo, sina boko u wura n ḡosirama Yerusalemwā. Ye na tunuma, yera na wa kōsa ye Eliasibu u kua ye u ka Tobiya diru wē Yinni Gusunōn sāa yerun yaaraō. **8** Ma na wa ya n wā. Ma na Tobiyan yānu kpuro gura na yari tōwo. **9** Ma na dera ba dii te deerasia. Ma ba Yinni Gusunōn sāa yerun dendì yāa ni kpuro wesia mi ka kēe ni ka turare ye ba ra dōo doke.

10 Na maa nua ma ba ku ra Lefiba ben bōnu wē. Ma Lefi be, ka wom kowo be ba koo sāaru ko mi, ba sōmburu deri, ben baawure u da u wāa win temō. **11** Ma na siri kowobu taare wē na nεε, mban sōna ba dera ba Yinni Gusunōn sāa yee te deri. Ma na wure na Lefiba ka wom kowo be mēnna, ma na bu wesia ben sōma sōo. **12** Yera Yudaba ba ka ben alikaman bōnu na ye ba wuna wōkuru baateren wōllē ka tamgia ka gumgia. **13** Ma na dii tēn mi ba ra dīa ni doke yāku kowo Selemia ka tire yoro Sadēku ka Pedaya, Lefibān turo nōmu sōndia. Ma na bu Hananu, Sakurin bii, Matanian debubu nōmu sōndia u bu somi. Domi ba sāa naanegibū. Beya ba ko n da begibū dīa ni bōnu kue.

14 Gusunōn Yinni, a de a n man yaaye nēn ye na kua kpuron sō. A ku sōmbu te duari te na kua ka naane wunen sāa yee te ka ten woodaban sō.

15 Yen waati ye sōo, na tōmbu wa Yudan temō ba resem gamamō tōo wērarugiru sōo, ma gaba doo bōkunu duusiamō ma gaba ketekunu tam sōbimō ka resem ka dāa marum mε ba mō figie ka maa sōmunu

ganu ba ka naamə Yerusaləmuə. Ma na bu kirə kua bu ku gāanu dəra təə te. ¹⁶ Tirigii be ba maa wāa mi, ba ra ka swēe ka kia dabinu nə bu Yudaba ka Yerusaləmugibu dore sanam wēragim səə. ¹⁷ Ma na Yudan wirugibu taare wē. Na bu bikiə na nəe, mban sənə ba kōsa mə ba təə wērarugiru disi dokemə. ¹⁸ Nge meya besen sikadoba ba raa kua. Ma Gusunə u sun wahala dabinu surema wuu ge səə. Yera ba kī bu maa win mōru seeya bu təə wērarugii te disi doke?

¹⁹ Ma na yiire bu Yerusaləmun kənnəsu kəne sanam me səə u dua təə wērarugiru tu sere tore kpa bu ku su kənia ma n kun mə təə wērarugiru tə kpa. Ma na nən səm kowobu gabu yi yi kənnə sin mi bu ku ka de səmumu ganu nu du təə wērarugii te səə. ²⁰ Yera kia bwese bwesekan dərobu ba kpuna wuun biruə nge nən yiru. ²¹ Ma na bu kirə kua na nəe, mban sənə ba kpuna wuun təəwə gbārərun biruə. Na maa bu səəwa na nəe, bà n maa yen bweseru kua, kon bu nəma doke.

Saa yen dəma ten di, ba n̄ maa naare təə wērarugiru səə. ²² Ma na Lefiba səəwa na nəe, bu tii dəerasio kpa bu nə bu Yerusaləmun kənnəsu kōsu bu ka təə wērarugii te yi Yinni Gusunən sə.

Yinni Gusunə, yeniban sə, a de a n man yaaye. Kpa a man kōsu wunen durom bakam sə.

²³ Waati ye səə, na Yuuba wa ba kurəbu sua Asidəduba ka Məabuba ka Aməniban min di. ²⁴ Ma ben bibu gabu ba Asidədugibun barum gerumə. Ba n̄ Yudan barum yē. Tən tuko baruma ba gerumə. ²⁵ Na bu taare wē, ma na bu bōrusi. Na ben gabu so, ma na gabun seri wukura. Ma na nəe, bu bōruo Yinni Gusunən wuswaaə bu nəe, ba n̄ maa

ben bii wəndiaba tən tukobu kəmə bu sua kurəbu. Ba ñ maa derimə ben əluwaqsiba bu tən tukobun bii wəndiaba sua kurəbu. ²⁶ Domi yera Saloməə Isireliban sina boko u kua. Sunə goo sari wi u ka nün weene handunia ye səə. Gusunə u nün kī. Ma u nün kua Isireliba kpuron sunə. Adama ka mε, kurə be ba sāa bwese tukunu ba nün sure durum səə. ²⁷ Yen səə, sa ñ maa kī su nə bu nεε, bεεya i taare baka yenin bweseru kua i bwese tukunu səə kurəbu sua, kpa i ko naane sariba Yinni Gusunən mi.

²⁸ Yoyadan bii turo, Eliasibu wi u sāa yāku kowo tənweron debubu, wiya u sāa Sambala Horonigiin biin durə. Yen səna na nün gira nən min di.

²⁹ Yinni Gusunə, a ku bu duari. Domi ba wunən sāa yero disi doke. Ma ba ñ arukawani yibie ye yāku kowobu ka Lefiba ba ka nun bəkua.

³⁰ Na dera ba gāa tukunu kpuro wuna ben suunu səən di. Ma na yāku kowo be, ka Lefi ben baawure wesia win səmburu səə. Ma na dera ba wooda ye məm nəəwa ye ya weene be, yāku kowobu bu məm nəəwa, ³¹ ba maa yāku dāa kasu yen saa səə ma ba ben dīa gbiikinu wē.

Gusunə nən Yinni, a de a n man yaaye yeniban səə.

Bibeli Gusunɔn Gari
The Holy Bible in the Baatonum language of Benin,
also called the Bariba language

copyright © 2013 SIM

Language: Bariba (Baatonum)

Translation by: SIM International

Bariba, Bibeli Gusunɔn Gari

This translation, published by the UEEB/SIM au Benin, was published in 1996.

If you are interested in obtaining a printed copy, please contact the SIM at SIM, BP 15, Parakou, Benin.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
00601790-b883-5da1-83f2-d05a7fa289a8